

玉茗堂全集

玉茗堂全集

臨川義仍湯顯祖著

序

李超無間劍集序

歲往洛佛有驅烏湯刺坐我堂東揖之知其奇
留之齋云不能斷酒也信宿而都無所斷偶爾
破口公案二三則耳居常率爾成詩心有目而

目有睛眉毫鼻吻間盡奇俠之氣一日問余何師何友更問天下幾何人余曰無也吾師明德夫子而友達觀其人皆已朽矣達觀以俠故不可以竟行於世天下悠悠令人轉思明德耳遂去之肝拜明德夫子像而復過我則髮已覆頂額間矣曰先生言俠不可竟行于世而予之俠粹未可除因而說劍爲天大將軍得度耳余笑

曰有是哉明年秋九月則已雄然冒武冠帶長劍而就余有吳下諸生書乃始知其江陰文士李至清也曰業已去書生爲頭陀去頭陀爲將軍弓劍之餘時發憤爲韻語數十首來豫章題曰問劍先生宜有以訣之余笑而問曰旣冠而娶乎曰未也然則劍不可得而問矣吳人而知于將乎其師鑄劍三年而金鐵之精不流夫妻

俱入冶爐中而劍就于將夫妻不能自投斷髮
翦指而已今子獨雄而無雌而又奚鑄焉生曰
先生其無戲曰非戲曰子謂必夫妻而劍耶莊
生說天子之劍褻以四時制以五行論以刑德
開以陰陽陰陽者夫妻也若然者上決浮雲下
絕地紀列子所稱視之不可見若有物存或見
影而不見光乃是物也然鑄此劍者皆不能殺

人生嘗斬髮而爲僧亦知有不殺人之劍乎殺
人者非劍也若吾豫章之劍能干斗柄成蛟龍
終不能已世之亂不足爲生道也因爲問劍答
而弁其詩

耳伯麻姑遊詩序

世總爲情情生詩歌而行于神天下之聲音笑
貌大小生死不出乎是因以愴蕩人意歡樂舞

蹈悲壯哀感鬼神風雨鳥獸搖動草木洞裂金石其詩之傳者神情合至或一至焉一無所至而必曰傳者亦世所不許也予常以此定文章之變無解者卧病罷客忽傳綬安謝耳伯遊麻姑詩數葉諷之古漢魏久無屬者耳伯始屬之溶溶英英翳魄陰煙有駘蕩遊夷之恩可謂足音空谷循後有詩導一章疊疊自言其致亦神

情之論也嘻耳伯其知之矣中復有記盱江夫子升遐數語若以死生爲大事嘻吁此亦神情所得用耶水月疾枯宗復何在唐人所云萬層山上一秋毫也偶爲耳伯叙此

學餘園初集序

先王旣往而鐘鼓篴磬之音未衰自漢以來至於勝國冠帶之士閭巷之人或鼓或罷或笑或

悲長篇短章鏗鉉寂寥一觸而不可禁禦者皆
是物也昔人常因其情之卓絕而爲此固足以
傳通之以才而潤之以學則其傳滋甚然以今
思之亦其時然也悲夫今之人得而爲昔之人
與吾衰且敝年十五師徐子弼二十友帥惟審
講古今文字聲歌之學至於今可謂劬矣觀歷
遊處感發而攄懷亦不爲少然反覆自循終無

可自好爲成者以吾之情不減昔人將才與學
不能有加於今之人也與托末契於後人予將
老而爲客遂有毛伯丘君頓致此道蓋其去諸
生成進士也財一期以餘有慈氏之喪歸而除
一園以居也殆半期耳而總其長賦已成四五
詩凡百篇他文字稱是嗟夫風煙草樹山川愉
愠之情行者居者各得而習之至若其鋪張摘

挾時物之精瑩人生之要妙盡取而湊其情之
所得至者雖學士大夫或拄口啗舌而不能吐
一字丘君乃能出其數千萬言縱橫流離磊砢
層集無不如志比其成也曾幾何年幾何時而
學餘園初集固已風馳於天下矣夫以予之晚
悟而早衰無所可至以天下學士大夫所不敢
易爲鋪挾者而毛伯君獨能爲之將其才與學

有異與一觸而不可禁禦者與然則予有不遜而托焉者與荃君與予友人鍾陵李乃始皆吾家霍林公前後所進士廼始之於斯道也久其所師友又畧與予同其亦有悲於予言也夫

太學同遊記敘

今上八年吾師四明戴公寔臨太學公誕乾坤之郁秀山淵之氣仁義中和粹其躬詩書弦勺

藻其物意念良深興屬甚遠八表之士靡不裹
糧負笈蹴屨摩袂爭來太學至若行綬之曉授
書之晨儵踰焉聶噎焉退則連袂而趨比席而
誦者真若雲鴈之儀霄雷蚊之響沛也是時偕
計之哲同遊者得若干人越蜀荆吳俱江漢之
靈采周韓陳蔡有汝潁之風流煌煌濟濟肅肅
雍雍殆庶不足容其德抑末不足儷其文語詔

則德在其間事事則政乎何有八分曰科之曰
士遠百行之疵俱吾所願從遊瞻依大聖者也
嘻哉委運不如繡幹與彫花形照投榮有適文
茵與隈落殊隕非所語於蘭言庶以明於蒞淺
夫聲應則有敬羣之樂迹遠則有睽孤之疑同
人者匹以鵲翰獸自者憐其夔足愆儀貴其攸
攝儒行徵其流言至若偏其反而緩急時有載

其半矣仁義何常故有急難之嘆奔走之交西
河夫子慊其離索東漢諸君隆其濟挹厥有由
也夫高惠神求猶云尚寐巨卿遠送曾爲未識
然且宛孌酬懷徊皇就義況乃負牆於一師管
道而同術都養者蒸然接爨學市者闐然讓售
斯其契歟何止夢寐之遊冥邈之寄而已乎然
或枯生不殊於炭燥濕曾不如銅忘情舊谷之

鶯媚好新華之鹿靜處則不如友生時移則或
爲小怨致有奪符之恨絕無班荆之救雖復齒
爲諸昆何異路人乎若乃郇同門以妬真綠纁
征而進否亦非太學蒸餹之意戴公提拂之心
也二者諸昆何有焉若如僕者或語或默載沉
載浮未能純經式訓將恐如孔子之斲觚也然
遊太學至久師董余公吳周公次師鄣許公豫

章張公俱提上聖之姿立弘獎之教維時人士
波湧然無記牒久而遺忘固人情也身自不然
每送抱於風塵或興懷於月品金陵方岳璧水
園橋前與三萬人遊衍其間至今繩提未或能
忘閱人爲世翻成撫心也諸昆今日疏列同遊
里氏豈不善哉各勗清時無忘戴公是爲序

二周子序

原夫雲書皎判開玉墉之冊奎璇發采繚玄扈
之文遂踰繩契競寫編謨上起三王真誥下底
百國春秋肇表天符撰維人理徵存會泯徒淡
緬邈之思而已蓋自皇訛帝矯王煩伯瘠緣是
影支離於多迹聲咬曉於不轂弘道君子閔其
若斯厥有史脩厥周藏之浮蕪滯秦關而強著
明竅妙生死之徒兵政王侯之決百有餘年通

靈闡繹仲尼年十七歲卽授此言布衣養徒衆
三千問答增損成其述作至天道與性終不得
聞也兩者絜之象帝之經特筌靈杳素王所說
務存乎昧嗣是而作分總兩流矣然皆和疾不
倫形影相難弟儒兄墨能無慙然歎我明二周
子連軒大志比作二書一曰調笑一曰何之畔
大地之清奧抉死生之靈詭拔玄釋之義根綜

斯人之條貫評往則死者有知徵來則聖人復
起人位並美必傳無疑功德如斯兼言不朽盛
哉是時長公尚璽南都忘年大學授而序之余
素無老子之恍忽兼乏孔子之中庸不在能言
之科粗標著作之意千秋讀二公之書者庶亦
明余是爲序

儀部郎蜀楊德夫詩序

楊公本井絡之秀體江漢之靈育德懿業之區
耀穎裁眉之秀固已苞結藝文優游玄釋矣遂
挾藻天漢騰輝日匝彈楚服之歌琴坐吳都之
禮署亦復端居多暇翰墨時作或是涼年獻歲
首夏兼秋撫鶯花而流悵睇鴻雲而寄想別有
羣公飲帳遊子河梁寫離別之奇聲究登臨之
遠致他若應真東遊雲氣西往懷仙緬竺類有

玄言沉靈激韻靡非清嘽吾友帥機最愛上林
甘泉洞簫諸賦嘗曰蜀有楊君世不減風流矣
夫楊君貌充而氣穆聲和而蹈正砥志雲屯乘
潛雨畜若夫登高者大夫之餘作賦者童子之
技楊君之業蓋不在茲楊君有言相如惑於玄
龍吾家子雲濡於紫蠅子淵隨於碧影他雖有
技所謂博奕者乎足以暢楊君之趣矣然其擢

管才情並詰亦安可不傳也余輒弱之資興屬
流獵閱有年日蜀如楊君者情途希覲之品焉
得咏淵作敬敘而歸之梓矣

吳越史纂序

赤城劉生集春秋吳越事爲書甚具而數以意
相繩引甚嚴書似可以傳無廢獨有感於吳越
之際兵之所繇吳越江湖間其民氣急去就頗

輕泰伯虞仲被髮采藥蠻荆荆人悅之因以爲
君厥後楚漢時吳芮保聚江湖間人亦因而君
之雖其俗易教便亦其民性不重去就也故曰
吳數有反氣起淮南至百舉修短不一姓然大
勢可觀矣皆遠大而疾亡絕無關河延博重靜
之意傳曰兵妖由人興泰伯兄弟三讓至德其
後園閭等兄弟叔姪以國爭相殺無已時如此

則謀臣子胥必入子胥入必霸而有越有越則
西子必入西子入必挾子胥之目而食吳王之
心越必有吳司馬氏有八王而氏羌入氣常然
也地勢吳爲喉越爲尾爲國則必相圖此亦延
陵季子王子搜所以不願爲君耳范大夫似有
道術存吳而去亦未爲不存越也因生有奇漫
而及此知我者其云然耶

岳王祠志序

越有忠佑祠者在臬司焉祀宋武穆王岳飛也
司故王宅王亡以爲太學元以爲司而祠王其
東祠宋孝宗之爲也祠志爲冊六凡王所自爲
文與其時至於今所以榮哀王者盡是梓而存
之司庶拜王祠下者貌而旣其實云王之勇於
忠孝其天性然斯志也其以資世之感愴流涕

指髮豈有間然者哉予獨怪王以大將之才爲
戰將之用而用益以不終當時無將將者然則
若肅代之將李郭可與曰韓蘄王可以竝郭而
王賢於李高宗之資不能爲肅若代亦其勢然
蘄王逸而鄂王拘非鄂王勇而蘄王智也鄂拘
蘄乃逸蘄逸而鄂之拘不免矣肅代雖疑其臣
不得而誅之外多大藩帥或以爲名如李司徒

召之不來矣終不能有加焉王之不肯爲李亦
勢然也或曰王何不竟滅虜而朝附於人臣出
境遂事之義此不然也觀金起時其君臣父子
叔姪將相之間皆意急浚毅經略雄遠非可猝
猝乘弊而竟者且其時諸將竝以詔還王以偏
師濟乎夫王以歸而死得爲世所哀憐仇而逞
王之爲王未可知也王所謂進退維谷者與嗟

夫有高宗以其宅爲官故有孝宗附其官爲廟
王爲人不可知神而後知之也雖然孝宗時而
王在猶之不能用王蓋孝之不能爲代亦猶高
之不能爲肅何也徽高在高與孝雖有志勢皆
有所不得行若使徽得幸蜀高孝爲親父子高
總國而孝撫軍滔然無疑蓋河南北之地以與
諸將所克王收其全以俟此亦高孝之所欲爲

也勢不能也嗟乎古今相予豈惟高之於王而已哉予志而悲之聊以告後之將將者

春秋輯畧序

孔子曰吾志在春秋行在孝經吾師明德先生時提仁孝之緒可以動天融融熙熙令人蓄焉有以自興春秋末之有詳也桓文之事仲尼之門無道者春秋時有褒貶非所雅言杜君與予

同師其於春秋也有師授耶春秋一孝經也孝
經自天子諸侯卿大夫庶人皆爲分明其孝曰
資孝以事君而敬同春秋多嚴君之義周公以
父配天孔子以王係天所謂其敬同諸侯卿大
夫有事君不忠者非孝也五刑之屬三千無大
於不孝者春秋其刑書與蓋至孟子以幾希別
人於禽獸曰庶民去之君子存之歷敘君子存

之者至君子之澤五世而斬五世者有虞氏三
王孔子也孔子存幾希之性全在春秋故又曰
春秋盡性之書也君子存之天下有孝子忠臣
庶民去之天下有亂臣賊子亂賊興而小人之
澤亦斬矣得春秋爲之懼而澤存得孟子辯無
父無君者爲禽獸而春秋之義益存忠孝同春
秋一孝經也安見明德先生言孝經非卽言春

秋與乾則雲行坤則履霜氣一而已杜君春秋
分隸五倫終以天應近於志氣交動之說其於
先師仁孝動天之旨不遠吾有取焉

孫鵬初遂初堂集序

漢儒疏五事以水爲貌而屬火於言誠不能無
概乎是今夫木之生其所以長潤森好恢瑰曲
折者大氏水之爲也極焉而措之爲薪火以傳

火者木之神明也而言者人之神明言而有以
傳傳以久則神明之所際也雖然顧可以忽貌
乎哉人之貌也明暗剛柔成然而具文亦宜然
位局有所不可以反置脉理有隧不可以臆屬
藉其神明有至不至其於貌也無不可望而知
焉 國初大儒彛鼎之文無所敢論迨夫李獻
吉何仲默二公軒然世所謂傳者也大致李氣

剛而色不能無晦何色明而氣不能無柔神明
之際未有能兼者要其于文也瑰如曲如亦可
謂有其貌矣世宜有傳者焉間者文士好以神
明自擅忽其貌而不修馳趣險仄驅使襍襍以
是爲可傳視其中所謂反置而臆屬者尚多有
之亂而靡幅盡而寡蘊則之以李何其於所謂
傳者何如也然而世有悅之者焉華容孫公鵬

初憂之嘆曰李何於斯文爲有起衰振弱功王
元美七子已開弱宋之路日已流遁長此安極
且吾先公四世文林劑量二公爲法已久不可
以失而公又蚤負才志入讀秘籍出視省奏淹
於今昔之故隱而益文嘗欲總史傳聚往略起
唐虞以來至勝國效遷史體爲紀傳之書而因
以櫟括十三經疏義訂覈收采號曰儒藏嗟夫

公蓋通博偉麗之儒矣至其爲文封奏志序記
牘歌咏引繩步尺取衷厥體勃溢者勢而延豫
者情叩切者聲而流蒞者致賅此五者故幅裕
而蘊深公之所以爲文也蓋江漢洞庭爲水淵
鉅足以滋演文貌而鶉首祝融爲火雖精是以
顯發神明然則公之文爲必傳傳而必久李何
七子之間有以處公矣

如蘭一集序

詩平機與禪言通趣與遊道合禪在根塵之外
遊在俗黨之中要皆以若有若無爲美通乎此
者風雅之事可得而言余宦遊倦而禪寂意多
漸致枯槁于四方人士所作時一過畱弗好也
而東筦鍾君宗望遊越中來臨偈以所自爲詩
讀焉殆雅與遊道合者凡遊遊于聲實之際而

止宗望秀于才常爲廣州諸文學冠以其先人
樂華君起名進士出館閣能讀父書足可優游
待舉睠此長遊者何也將江甌閩人士多其家
門生義故公子微以是游耶其友師生從升從
龍知之曰今宗望之游若爾則世之游閩公子
耳似殆有不然者其爲人貌沉而氣疎幽然頽
然好欲與天下山川人物相駘蕩當其所愜布

衣蝦菜可以夷猶歲時其所不欲非可餌而止
也蓋宗望之見趣有殊絕世之聲實者予聞而
笑曰深于遊道也乎詩道也悟言一室之內旬
日不出映心千里之外累月忘歸通之若有若
無都無遲疾欣厭之累於以眷節懷交必有不
推排而齊一雕飾而秀者南中之美何必翡翠
明珠茲且以巴丘小華山有王子晉笙鶴遺跡

欣然慕之此其爲詩與遊也殆益僂僂矣

讀漕撫小草序

漕撫關中李公道甫初以東南海警開府維揚
海波澄謐而稅使乃始稱詔橫亂徐沛吳揚之
間皆公履也其爲夷戮甚大非迅鬪所支公能
以筆墨口舌動主上黠者暗以死次者屈服
受事此朝廷之喉味而天下之要脊處也五方

四裂之民在焉莫不倚公爲命歌謠萬里此亦
足以挫厄乘流發決英雄之氣矣當是時公亦
欲以微罪去舉朝爭之天子若爲不得已者
而盡其用居之淮筦天下金粟之運所上下疏
奏教答委積至若干卷蓋政成而思其所嘗遊
連於余以相示也受而讀之大者力奮其身號
怒戲笑與中貴人相橫決爭數千里之民命貧

者徙者可以復業居可以居行可以行而亂可
以止所謂社稷之力臣也夫功有所自成而
力有所自積小夫懷臣之徒其於天下事潰敗
無足論者蓋亦時有有力人矣與之扛千鈞之
鼎探豺虎之穴旋轉噴薄而無懾使之提細物
抵蜂蠆或反倉卒頽破螫觸而無當何也以爲
其力無所用之也夫力豈有異哉用之則大可

以全不用之小可以敗用世之力亦何以異此
公疏奏文檄中大者所謂舉釣石而當猛鷲噴
喝示武嘻噓示閑英雄之槩有固然者至其所
爲繩墨吏士罰咎以上未嘗不親極其微渺出
入之情而誚責所治於罷士細人拊循收恤無
有二也孝敬中行之理時取以生其善而滅其
詭卑語微詞皆有法則氣整而味平此有力之

士所爲常器小螫無所屑意者然則公之用力
於世者豈有餘哉教義刑名不爲小而河渠盜
賊不爲大公所以收百萬士民之心起百十吏
士之氣而感動 天子擊折亂倖至十疏以去
而滿朝爭之 天子終不聽公去更以委重者
豈非力之有所積而功之有所成哉臯陶言九
德之行曰亂而恭剛而塞恭固可以治亂而塞

余歎曰行子之言其亦可以宗矣因取而書之
岳陽諸王籍之首

義墨齋近稿序

凡爲文苟有材方志意之士咸欲有以傳其人
傳其人而不有以出乎人雖窮歲年謝歡昵疲
形焦思以文之猶弗傳也故士之有所爲于此
者必皆以出乎人爲心然而環視天下之爲此

者亦衆矣其材力其志意翩翩焉兀兀焉捷疾而爭高巧質之相乘玄思之相傾卒未能有所出也嗟夫古文詞不可作矣今之爲學士本業者而欲有所出乎人其亦且奈何哉雖然就其相乘相傾之處而盡調其無所出乎人則是世無人也何也舉天下之士奉其材力志意而畢爭於此然則今之世所爲出乎人而庶幾有倚

焉者其亦可得而槩矣蓋余所聞見天下士時
日有之屬者得不首王生天根來與起居浹旬
視其材力志意超然豁然歸於大雅吾里居十
數年未嘗見士如此其達者也古書傳余少壯
所涉貧病衰落皆已忘去生時時爲我舉誦本
未慷慨流連之際至不容聲與論詩歌曲度能
悟發于音外之音致中之致至於今昔賢豪進

退之故亦能舉其形勢而衷其淺深蓋生於荆
爲望姓世多達人而身復明裕其好全楚高流
無不爲生握手者天祿承明何地顧不宜早有
此人哉閱三十而未仕于昔人爲早以生之達
而當于今亦可謂之達遇矣天下士惟無材力
志意而止耳有之則常泛濫於兼爲而遷延其
本業若然者亦非世之所得而遇也生得微類

是與乃大不然者生告我曰某雅也穎而橫
家君教以自成其文無所取故常爲作必奮切
鼓蕩絕人而後措一語友生譏之曰此豈以傳
者耶冠而病殆死起而曰吾知之矣自有此技
以來精奇恢詭之作宜與古風雅金傳何得悞
心自智而不一縱觀旁薄今昔乎乃誓以十年
之力收拾導擇證據批摘彙之如品唐詩者凡

得文萬篇當其時兄弟三四人坐一小園中分
櫺而閱之鑿垣而饋凡再月一朝嚴君更番者
數焉而乃得其所以爲文試一題至累日不能
下茫然若有遺墮然若有忘若此者之於本業
也亦可謂窮歲年謝歡昵疲形焦思以爲之者
矣而近得文若干首此若干首者知其于世所
爲復何如也余聞而悲之亟取視焉文雖不多

而一篇之中斷續起伏流變處常有光怪其所
欲言則反覆痛道詳麗轉致若與曉人良晤期
于傾盡其所懷而常若有所不盡其所不欲言
則衍案掩抑寥戾稽詰如與陳人道中莽蒼數
語而意態常在所言之外此其中倘亦言外之
音致中之致與非有十年之力銷鑠萬篇宜不
及此余樂之甚錄示兒開遠等而稍爲點其煩

長者得九十餘首傳之嗟夫生蓋有所出於人也乎

朱懋忠制義敘

通天地之化者在氣機奪天地之化者亦在氣
機化之所至氣必至焉氣之所至機必至焉孫
策起少年非有家門積聚之勢朝廷節制之重
然以三千人涉江淮吳會止有江東袁曹貽曜

而不敢正視然竟以蹶此氣勝而機不勝者也
諸葛武侯精其技至于水牛流馬然終不能出
漢中夷陵一步窺長安許洛者此機勝而氣不
勝也天下文章有類乎是莽莽者氣乎旋旋者
機乎莊生日萬物出乎機入乎機天下有中氣
有畸氣中主要而難見畸挈激而易行氣與機
相輔相軋以出天下事舉可得而議也吾以爲

二者莫先乎養氣養氣有二子曰智者動仁者靜仁者樂山而智者樂水故有以靜養氣者規規環室之中回回寸管之內如所云胎息踵息云者此其人心深而思完機寂而轉發爲文章如山嶽之凝正雖川流必溶消也故曰仁者之見有以動養其氣者泠泠物化之間亶亶事業之際所謂鼓之舞之云者此其人心鍊而思精

機照而疾發爲文章如水波之淵沛雖山立必
陂隨也故曰智者之見二者皆足以吐納性情
通極天下之變下此百姓文章耳蓋日用飲食
而未嘗知爲者也余與懋忠尊人景岳先生學
同校宦同地最久懋忠因時時過而論蔡焉殆
數年于茲矣未嘗不以氣機二字相屬而近讀
其所奏文章三十篇則兩者俱來矣勃律辟辟

其高華之執也天紹汪沆其長廣之思也捷疾
倏燦不傷于法增積委磊不傷于神殆又于山
水動靜之意而庶幾焉者懋忠爲我言曰生意
所欲爲固不止是時時讀書爲人間事所廢不
然殆有進而可以當先生者然則生之所以養
氣發機者得微有偏智之累乎雖然持此三十
編者正正堂堂與天下智計之士奪蘄而舞江

以東不足爲也

玉茗堂全集卷之四

終

玉茗堂全集

臨川義伯湯顯祖著

序

蜀大藏經敘

大藏經乃迦葉尊者文殊大智闍昧筌文紐玄
撰極蒼晶佇其淵色眷屬皈其檀度所以拯接
根蒙圓明竅幻者自周昭掩宿而後莫與倫采

文

五卷

一

矣象帝標玄竅之觀似已涉其空實素王開貫
一之宗亦未消其能所道則縱而荒寬儒則拘
而齷宇明虛者傷華辯之雕守殘者慮小言之
破由斯以則殆邈絕於西音矣是以聶法空之
所泯則形識俱遺屬一多之所冥斯性塵並杳
若乃波想者夷陸顧杭影而每遲熱愛者焚和
渴涼雪而已後故旋因慧業非竟證之所圓細

滑聲香非等觀之所外至如報身六道本屬未
來解難千聲寧容勿怖良以惡趣易淪身器難
拔是用垂心巧趣畧影神通緣廣行而立方非
至人之通喻也茲理虧蘊茫無印擊南北二都
間啟玄集等趨諷論曉不攀翳旋爲疑法悟不
真修增名佞佛中土已爾况在遐徼今蜀法師
某體西方之秀氣發南瞻之勝心出身許道化

物爲宗倡自蠶叢來購龍藏過明月之峽則戒
景夜淨度神雲之觀而空華曉廓振策與井之
區止後玄枵之次泛綃川如淨海跋翠危若平
道往返如斯卷笈無恙蓋亦諸天冥贊龍神合
擁靈契如斯顯閭矣實賴復城楊公江漢育其
英潤大塊資其玄量淡心不二鎔想第一前現
宰緣而試諦今托郎瀆而精進感彼西來之意

都無上慢之心并力經營平標旨格威儀功行
可爲讚嘆者矣如某者雖轉迹於風埃實韜懷
於月相流慈善友非今日矣丙子朱明謬繙經
於長干故寺己卯玄朔忝升座於清涼勝墟今
已翦情嚴律含識無學間以微言相約不欲雄
機接辯矣偶鑒往僧之勤苦奉楊公之弘施復
爲趺揚首義於多寶之窟聊抽寸珠香藥之林

仍念片葉庶西方大衆啟軸知歸獲以嗣宣闕
韻普餐力味龜城淨爲鹿苑峨嵋升爲鸞嶺非
弘願與至於畢繹是正廣繕別本使四部恒流
三災不壞是在善緣引領禪悅

五燈會元序

達磨西來掃滅文字五燈出文字復爲崇矢大
都此方教體是伊聲聞而支那傳心文爲結習

神而明之存乎其人耳能道人得法黃梅初心
亦用金剛語證入文字亦何負於此方哉慧經
其能道人後身耶誕生時已感經聲而來啟悟
復從應無所住而入及其了徹乃證入杉山不
思議境夫杉山馬駒下人始終證悟與曹溪若
合符節其爲能道人再來無疑刊五燈會元嘉
惠承學用熟來因耳莊語火傳佛心燈傳燈燈

相度今之爲燈光者非昔之爲燈光者也而其
爲燈明一也向使佛心可傳則三藏亦足如不
可傳文字不乃爲祟耶嘗謂迦葉拈花別開一
路持表示信祇因此土文習業深因緣依文不
捨故其五葉兒孫惟用一翻字法門掃除文障
直指心地法門其於文字蓋亦無幾矣而見色
聞聲見聞爲倚至臨濟棒喝一施生死本除故

曰無始劫來生死本變人與作本來身既已歸
穴焚巢豈非祖家一快而在慧一啟真贋轉紛
不得已分其正偏別其實主用寶珠而酬王子
以茅土而賞勳臣嫡庶之分既嚴真偽之差始
現則雲門法眼之苦心而曹洞以來不失之家
法也若如僞仰父子默相指授以忠國師三十
六字傳心其事顛漢唐之護秦璽實乃周孔之

守義晝耳既使文字之徒無處住足亦令捧喝
之流無從下口而獅乳醍醐始不爲馬駱牛漿
溷立法至此辯統益嚴究其指歸要不過一直
指心地法門而已故曰五燈支子不過用一翻
字法門卽有強項魔王痴心調達跳出五燈之
外不殊一鼓之弄琵琶乃知文學盛則律嚴律
嚴利用解故有契北之街頭少林之酒肆解慧

學盛而解復狂解狂利用肅故有神光之定業
神秀之北宗嗚呼解之何心肅之又何心則釋
迦支吾當場弄醜達磨佞倆魔魅兒孫南北二
宗可曾其元直向文字堆中蝕穿故紙溪山頂
上坐破蒲團亦與契北示現之一燈明耳經之
言曰宗眼不明非爲究竟後有閱五燈會元得
其眼者乎慧經之報佛恩不虛矣

王季重小題文字序

時文字能干筆墨之外言所欲言者三人而已
歸太僕之長句諸君變之緒音胡天一之奇想
各有其病天下莫敢望焉以今觀王季重文字
殆其四之而季重以能爲古文詞詩歌故多風
人之致光色猶若可異焉大致天之生才雖不
能衆亦不獨絕至爲文詞有成有不成者三兒

時多慧裁識書名父師迷之以傳註括帖不得
見古人縱橫浩渺之書一食其塵不復可鮮一
也乃幸爲諸生困未斂達踴躍出沒于校試之
場久之氣色漸落何暇議尺幅之外哉二也人
雖有才亦視其所生生于隱屏山川人物居室
遊御鴻顯高壯幽奇怪俠之事未有覩焉神明
無所練濯匈腹無所厭餘耳目旣吝手足必蹇

三也凡此三者皆能使人才力不已焉才力頓
盡而可爲悲傷者往往如是也若季童者五歲
遍受五經十歲恣爲文章二十而成進士蓋一
代之才也而天亦若有以異之者大越之墟古
今冠帶之國也固已受靈氣于斯而世籍都下
往來燕越間起禹穴吳山江海淮沂東上岱宗
西遙太行歸乎神都所遊目天下之殷脊喉顙

處也英雄之所躋美好之所鋪成在矣於以豁
心神紆眺聽者必將鬱結乎文章而又少無專
門承學之間靈心洞脫孤遊皓杳蚤爲貴公鉅
人所賞聞所未聞出見少年裘馬弓劍旗亭陌
道之間顧而樂之此亦文心之所貽佇也身復
蚤達曾無諸生一日之憂名字所至贊嘆盈矚
故其爲文字也高廣其心神亮瀏其音節精華

甚充顏色甚悅綬焉者如嶺雲之媚天霄綯焉
者如江霞之蕩林樾乍翕乍辟如崩如興不可
追視莫或殫形大有傳疏之所曾遺著錄之所
未經者矣嗟夫以一代之才而絕三者之累若
此不亦宜乎其爲古文詞詩歌又何如也雖然
才士而宦業流通亦無以周世物之容而旣以
當塗令高第爲郎矣復抑而命青浦青浦故屠

長卿所治縣也長卿旣以此出大魁名天下而
季重書來乃更以歸休讀書爲懷夫季重固已
讀書矣凡爲若談者當亦有未盡其才之嘆耶
然則天之于季重誠若有以異之無已也夫

攬秀樓文選序

蓋嘉靖後二十年中南州文學士輩出司文命
者又雅意臨視之精其教而美其食士各偉博

通遠自好文無慮數十家名公卿郎吏二千石
賢豪好修之士多在焉易同人而後大又曰大
而後可觀此一時也後稍教養衰替士各爲學
而陳鄧二公自以制舉義爲天下第一陳公猶
有他文字十數篇鄧公獨傳試春官七義耳聞
之鄧公多閉閣自證其理理爲通物或同學而
求或獨造而致大于材而正于品固無異也嗣

是南州數君子相與講習其風不絕余每如童
門前後旅進就業者往往而是會攬秀樓中其
盛積文字三百首登覽餘閑時爲裁定點正蓋
同而大大而可觀又將有在于此夫豫章多美
才江湖之濱無不猥大常然矣顧其中有負萬
乘之器而連卷離奇有備百物之宜而爛熳歷
落總之各效其品之所異無失于法之所同耳

已况吾江以西固名理地也故真有才者原理以定常適法以盡變常不定不可以定品變不盡不可以盡才才不可強而致也品不可功力而求于言之吾思中行而不可得則必狂狷者矣語之于文狷者精約儼厲好正務潔持斤捉引不失繩墨士則雅焉然予所喜乃多進取者其爲文類高廣而明秀疏爽而蒼淵在聖門則

曾點之空餐子張之輝光于天人之際性命之
微莫不有所窺也因以裁其狂斐之致無詭于
型無羨于幅綦然颯颯然證于方內未知其
何如妄意才品所具若茲于先正所爲同而求
獨而致者或不至遠甚各公卿郎吏賢豪好修
之士時而試天下第一者將有在與嘻此諸君
子所自爲豈世目所得定也

合奇序

世間惟拘儒老生不可與言文耳多未聞目多
未見而出其鄙委牽拘之識相天下文章寧復
有文章乎予謂文章之妙不在步趨形似之間
自然靈氣恍惚而來不思而至怪怪奇奇莫可
名狀非物尋常得以合之蘇子瞻畫枯株竹石
絕異古今畫格乃愈奇妙若以畫格程之幾不

人格米家山水人物不多用意畧施數筆形像
宛然正使有意爲之亦復不佳故夫筆墨小技
可以入神而證聖自非通人誰與解此吾鄉丘
毛伯選海內合奇文止百餘篇奇無所不合或
片紙短幅寸人豆馬或長河巨浪洶洶崩屋或
流水孤村寒鴉古木或嵐煙草樹蒼狗白衣或
彝鼎商周丘索墳典凡天地間奇偉靈異高明

文

五卷

士

古宕之氣猶及見於斯編神矣化矣夫使筆墨不靈聖賢減色皆浮沉習氣爲之魔士有志於千秋寧爲狂狷毋爲鄉愿試取毛伯是編讀之

張元長噓雲軒文字序

天下大致十人中三四有靈性能爲伎巧文章竟伯什人乃至千人無名能爲者則乃其性少靈者與老師云性近而習遠今之爲士者習爲

試墨之文久之無往而非墨也猶爲詞臣者習
爲試程久之無往而非程也寧惟制舉之文令
勉強爲古文詞詩歌亦無往而非墨程也者則
豈習是者必無靈性與何離其習而不能言也
夫不能其性而第言習則必有所有餘餘而不
鮮故不足陳也猶將有所不足所不足者又必
不能取引而致也蓋十餘年間而天下始好爲

才士之文然恒爲世所疑異曰烏用是決裂爲
文故有體嗟誰謂文無體耶觀物之動者自龍
至極微莫不有體文之大小類是獨有靈性者
自爲龍耳近吳之文得爲龍者二龍有醇灝豐
煒雲氣從滃鬱而興幽毓橫薄不可窮施者錢
受之之文也有英秀蜚媚雲氣從之夭矯而舒
凌架傾洗不可測執者張元長之文也受之之

文已貴獨元長廢然家居尚未有貴而獨行之者山東王公又新爲常郡理得其文愛重之馳以示予讀之旣嘆曰所爲文目天下之至襍而不可厭也出入元長指吻間而天地古今人理物情之變幾盡大小隱顯開塞斷續徑延而行離致獨絕咸以成乎自然讀之者若疑若忘恍然與之同情矣亦不知其所以然然則元長不

嘗試爲墨程習乎曰彼以靈性習之者也度其
十餘年中習氣殆盡故伎巧至于斯善乎王公
題其文曰噓雲言噓氣成雲也龍也龍何習哉

序丘毛伯稿

天下文章所以有生氣者全在奇士士奇則心
靈心靈則能飛動能飛動則下上天地來去古
今可以屈伸長短生滅如意如意則可以無所

不如彼言天地古今之義而不能皆如者不能
自如其意者也不能如意者意有所滯常人也
蛾伏也伏而飛焉可以無所不至當其蠕蠕時
不知其能至此極也是故善畫者觀猛士劍舞
善書者觀擔夫爭道善琴者聽淋雨崩山彼其
意誠欲憤積決裂挐戾關接盡其意勢之所必
極以開發於一時耳目不可及而怪也吾鄉丘

毛伯文頗類乎是其人心靈能出入於微眇故其變動有象常鼓舞而盡其詞詞以立意爲宗其所立者常若非經生之常意矍然而可喜餘理之固應如是也迫促刼悟案衍固獲咸其自取力足以遂之機足以轉之如毛伯者世之奇異人也傳曰同明相照同氣相求聖人作而萬物覩蓋聞世有霍林先生者其人正而通於大

道善爲典則之文天下人士苟有意乎言者以
其文爲聖而師之然莫敢自名爲高弟子者而
吾鄉毛伯在焉遺其滅沒之形收其靈異之氣
世多疑霍林先生好奇士乃不類其所自爲嗟
夫雖先生亦安得以其所自爲率天下士哉顧
士有所謂奇者必如吾鄉毛伯焉其可也

汪閻夫制義序

文

五卷

十六

說者云舒櫻寧實蚤慧其家司馬故晦之以神
其事夫以櫻寧之大對其援古昔切時世有學
究老吏所不能說者良不妄以予所聞汪閻夫
何年少而多奇也其爲文奇肆橫出頽豎獨絕
旁薄而前天下莫能當聞其家太史故欲爲晦
閻局之深室真書數萬卷絕不通賓客度非太
史不能成閻夫矣雖然閻夫之光故自難揜賈

生弱冠吳河南舉秀上聞王僧虔弱齡袁司徒
望風推服世患無吳表耳此道父不能譽其子
亦安能閤其子耶風胡之治劍也百辟而成之
秘不以示人而鋒芒發絕迺至于斗截彗飛鳴
吳出楚其秘之久也玉人之攻玉也百琢而成
之不示人以璞而精華流炫迺至晁采宵光城
秦國號其藏之久也聞夫之秘藏久矣太史可

出以示人矣

陽秋館詩賦選序

夫有盡者生之所資無盡者性之所愜居室儻
藉所以資生山水咏述所以愜性滯所資之役
遺所愜之契則謂之世人盡所愜之期遺所生
之累則謂之出世人兩人皆殉而趣度杳絕聲
音粗妙亦隨以移差易了耳隱世人之迹明世

外之心托居室于山水遲儼籍爲味述凡夫藩
籬之具代耕之物就之則羊羶可厭棄之則鷄
肋可惜勉身和就疑志或躍憤懣有午爵撓漏
射精繁越于興居思沉迴乎往復若援曲匏而
嘯矍洞疎琴而切造礪頑宮商之內澆澗羽角
之際自各一家足稱高士集者則吾兄帥惟審
耳惟審成童舉于鄉逾壯始成進士除縣長不

拜掌故汝寧遷太學正主虞部事乞南至膳部
郎滿歲出守思南謫分齏於越量移鄴郡丞復
拜南北部郎引病自免君慧敏純固特于討論
一路映發操結亦復好之下帷佔畢至忘馬色
行路思惟或墜坑塹博物精理代欲寡貳加以
嘆世慕古長想遠思口不談阿堵之事手不執
琉璃之器聲譽兼絕枕席鉛槧酬名理則至暮

忘食啟時勢則白日欲寢既以避宦曲折感槩
遂多小楊墨而無讓非湯武而不顧阮嗣宗愛
東平土風張思光喜晉平間外然而金張靡托
年事漸往衡泌稍葺糧藥粗立哀樂之外無復
措意先有集若干卷龍蛇在歲彼病息夏會予
歸自嶺海謂曰千秋誰知定吾文者可謂知言
余集予其定之乃爲正定若干卷君復閉戶清

削減前十二三稿就而卒卒後十年桐城劉君
燕及實來弦歌茲暇欽企舊德命刻以傳因爲
論之江湖以西柴桑令友顏謝之間當改革之
運委志不仕義取素賁和澹蕭遠固其獨致而
思南君性寄凝藹運直休泰散郎荒牧雅足流
蒞資生愜性不至睽裂故可以吐朝市而納星
壤憎寒暑而便清燠年德轉升望實弥定深穠

君求我於僻劇譚逾晷矣袖出一篇拭淚而視
余曰此先子司空大夫之什也不敢以行於世
敢以藏諸宗當爲令而梓之君爲言其首余讀
一再過嘆語之曰余見今人之詩種有幾清者
病無有者病濁非有者之必濁其所有者濁也
杜子美不能爲清况今之人李白清而傷無余
嘗爲友人分詆而作詞因知大雅之亡崇于工

律南方之曲刊北調而齊之律象也曾不如中原長調庵庵隱隱淙淙冷冷得暘其才情故善賦者以古詩爲餘善古詩者以律詩爲餘君之先子唐人筆也然宦遊酬對多爲律詩所以芳華微吐藻實猶蘊大抵擬工于杜而清勝之其孟浩然劉長卿之亞也嘗亦有從聞詩者歟君愀然曰受大父教因出其大父自谷先生之誦

餘讀騷經爲閨賦者也又經與其弟魯源先生
沉繹古學詩思醇深余嘆曰靈根濬源司空大
夫上有父下有子子爲人復端亮而仁孝大夫
爲不亡君索歆而謝日子之言可以引矣徐生
出門余復謝客

金竺山房詩序

詩者風而已矣或曰風者物所以相移亦物所

自足有不可得而移者十三國之風采而爲詩
舒促鄙秀澹縟夷隘各以所從星氣有直水土
有比宮商之民不得輕而徵羽明條之地不得
垂而間莫此儀所以南操而舄所以莊吟也江
以西有詩而吳人厭其理致吳有詩江以西厭
其風流予謂此兩者好而不可厭亦各其風然
不可強而輕重也立言者能一其風是以有行

于天下若夫金右辰之詩有不止一其風而並
兩者以究焉唐貞元以後言詩而相遜煇李杜
止爾予觀右辰才氣淳積崑崙瑰瑋延衍魁然
其大而不可以細視也又兀乎其奇而不敢以
正視也想其含吐揮設之際思緒興寄雲湧而
興颺發而成如萬竅倏厲倏濟騷騷而于于如
屠坦一日解十二牛四顧滿志誠有隴西不足

爲其輕少陵不足爲其重者嘗戲之曰永新山
川幾許而嘗有生生曰某非永新而已也而來
吳大鄣嘻吁其知之矣新安者江吳之集而永
新者江楚之交其地脉精采射越當乎右辰故
其詩旁魄憤發幽繚致屬則大鄣之氣也標貫
玄微該驗條傳則又非若吳人之風露自賞者
兩者之風較然粲然矣得一爲美好而況其兼

焉而不專者乎客曰生之詩直寄焉已耳生廣
涉天下經制之事好與大人先生相傲倪夜半
醉臥或竟日抵掌與語星歷氣候山林兵策河
渠園府方技稗說曷以玄釋辯如決河中如射
覆大人先生卒當之口挂不能窮也其大且奇
如此然生故遠千里而與我書曰身爲掌故弟
子不宜越俎而議風雅夫風雅正弟子事蕪深

詣邁出且退然若斯則其與大人先生譚開濟
厄塞諸大畧豈可易測識者耶孟子言尚論者
誦其詩知其人生非詩而已也因如其人以序
之云

王生借山齋詩帙序

江左王氏世濟其美於明則王氏顯於齊安齊
安在江北然故江東地也稚欽太史崛起武廟

時以節義文章雄長一時子聲繼之子雲其再
從弟也造物之與於人也多所惜厚之花者靳
其實傳之翼者兩其足稚欽以異材自顯幸乃
讀中秘書詎擯斥以歿子聲不爲不蚤達竟終
臨漳令不究其施故王氏之聲怨而多思其節
婉以悲殆與騷近有風人小雅之意焉怨而無
誹悲而無傷子雲之聲何其多怨也語云士不

窮愁不能著書天亦窮子雲以發其聲吾聞其
宗有行父厚之叔芳皆能世其家學宗之窮愁
爲甚王氏何多材哉英英然追江左矣一家之
中挾江漢湘騷而起者後先六七人其取於造
物多矣造物妬之固宜